

TE HAHURAA API

I neia i te piha neneiraa na te Ekalesia a Iesu Mesia i te Feia
Mo'a i te Mau Mahana Hopea Nei i Papeete, Tahiti,
i te mau fenua Sotaiete, i te mau avae atoa
Te hoo e piti farane i te matahiti hoê.

Nu. 11.

Novema 1930.

Mat. 24.

Te Faaroo no te Feia Mo'a Mau.

Ua iritihia teie nei parau na roto mai i te buka: "Te Hiro'a Faaroo"
i papaihia e Tamate Aposetolo; Faaubhia ei reo Tahiti e Elita.

HIRO'A FAAROO 13. *Te faaroo nei matou e, eiaha e
eia, eiaha e haavare, eiaha hoi e taiata, ei aaui mara ra, e
te viivii ore, e te hūmani-maitai raa'tu i te taata atoa. * *
* * * * * E mai te mea te vai atura te hoê mau mea
tia ra, e te mau mea viivii ore ra, e te mau mea popouhia ra
e te mau mea roo maitatai ra, e feruri maite â ia matou i te
reira. --Iosepha Semita.*

(E tuatiraa teie nei parau.)

Uiraa 10. Eaha te haapiiraa na te Ekalesia no nia i te
faaipoiporaa mure ore?

P. No te mea ua horoa mai te Atua i te faaipoiporaa
na te taata, te haapii nei matou e, e ere ia te reira no teie
nei ao anaé, no te ao varua atoa râ ia. Area râ ia haama-
nahia te taata o tei faaipoipo atu ia vetahi ê, e tia'i. Ua
haamanahia te taata ia rave oia i te faaipoiporaa no te hau,
e no reira ua tia atoa ia haamanahia te taata e te Atua
ia mana te reira faaipoiporaa i te ao ra. Ua hope te mana
no te faaipoiporaa tino nei i te taima e pohe ai te taata; mai

te mea râ ua haamauhia te reira faaipoiporaa e te Atua na roto i Ta'na tavini i maiti-mau-hia, ua mana atoa te reira i te ao varua ra, e ua nehenehe i reira ia raua ia faatupu â i te huaa no raua e te Atua.

Ua ravehia te reira huru faaipoiporaa mure ore i roto i te hiero anaé, e aita roa i rapae i taua fare moá ra. Ua faatiahia te Feia Moá atoa ia haere i roto mai te mea ua mâ ratou e te haapao nei ratou i te mau ture a te Evanelia. E ua riro te mau tamarii tei fanauhia i raro aé i te reira faaipoiporaa ei mau tamarii mau na taua Metua ra, i teie nei ao e a muri noa'tu.

Uiraa 11. Eaha te haapiiraa na te Ekalesia no nia i te taoto-noa-raa i te tane e te vahine mai te faaipoipo-ore-hia?

P. Ua parauhia taua hara nei i te faaturi, e te pora-neia; e ua faahapa roa te Ekalesia i te reira raveraa. Te na ô maira Alama, te peropheta, no nia i te faaturi e: "Aita oe i ite, e ta'u tamaiti e, o te mea faufau teie mau mea i mua i te aro o te Fatu ra; ua rahi atu teie mau mea i te ino i te mau hara atoa, maori râ o te taparahi i te taata hara ore, e te hunaraa i te Varua Maitai ra?" (Alama 39: 5.) Ua farihia te reira ei haapiiraa na te Ekalesia, e te vai atoa ra te tahi mau parau faahaparaa no te reira e tae noa'tu i te huriraa i te feia faaturi i rapae i te Ekalesia.

Uiraa 12. Eaha te haapiiraa na te Ekalesia no nia i te haapaoraa i to tatou tino?

P. Ua na ô maira te parau tei papaihia e: "Aita outou i ite e, o te hiero outou o te Atua, e te parahi ra te Varua o te Atua i roto ia outou na? E haaviivii te hoé taata i te hiero o te Atua ra, e pohe oia i te Atua; e moá hoi to te hiero o te Atua, e taua hiero ra o outou ia." (Korinetia 3:16-17.) No reira ua tamata noa matou i te ora mai

te viivii ore ia mâ maitai to matou iho mau hiero. Te vai ra te mau maa e au i te taata e ua horoa mai te Atua i te heheuraa no nia i te maa e au e te maa e au ore i te tino; e ua opanihia te Tî, e te Taofe, e te ava, e te avaava, e te mau mea mai te reira te huru o tei faarepo noa i te tino, e tei faairi i te taata ei maamaa; ua faaite atoa maira te parau e, eiaha e amu noa i te inai, e haapao noa i te mau mea maitai ia amuhia. E ua horoahia'tura te faufaa i te taata tei na reira i te haapao, i te na ôraa e: "E te mau feia moá atoa o te haamanaó e o te haapao mai te rave i teie nei mau parau, mai te pee e te haapaoraa i te mau faaueraa, e maitai te roaa i to ratou ra pito, e e puohia to ratou ra mau ivi, e iteahia hoi ia ratou te paari e te vairaa rahi no te ite, oia hoi te paari i hunahia ra; e horo hoi e e ore e rohirohi, e haere hoi e e ore e fiu; e te faaite atu nei au, o te Fatu, ia ratou i te parau e, e fariu ê atu te melahi taparahi ia ratou mai ia'na i na reira i te tamarii a Iseraela ra, mai te taparahi ore ia ratou. Amene" (Buka Fafau, 89:18-21)

TE HOPEA

Te Metua Parau Tia

A taió tatou i te parau i roto i Luka 15:11-32. Ua parau atura hoi oia, toopiti a te hoé taata tamarii tamaroa. Aita te teina i mauruuru i to'na faaeearaa i te utuafare o to'na metua tane. Ua parau atura oia i to'na metua, "A horoa mai i ta'u tufaa i te taoá nei. Te hinaaro nei au e haere i tahi fenua ê ra, e imi i ta'u iho ravea."

I muri iho, ua haaputu oia i ta'na mau faufaa atoa e ua haere atura i te tahi fenua ê roa. Ua puhura'tura i ta'na taoá i tera vahi e i tera vahi mai te haapao-ore-raa. E pau

roa aéra i ta'na moni, i haamata mai ai te hoé oé rahi e ati ihora oia i te poia.

Haere ihora oia i te imi-haere-raa i te ohipa, e ua rave oia i te ohipa faaamu puaa na te hoé taata. No to'na poia ua amu atura oia i te huru maa ta te puaa i amu ra, e aore hoi e taata i hopoi mai i te maa na'na ra. E amu atura oia i te reira maa i tera mahana e i tera mahana, feruri ihora oia e mea maitai ia hoí oia i to'na metua ra, e rave i te ohipa na'na, no te mea, ua haamanaó oia i te maa ta to'na metua i faaamu i to'na mau tavini.

No te manaó i tupu ai i roto ia'na ra, ua hoí oia i to'na metua ra, e tei te atea ê â ra oia, ite maira to'na metua ia'na, aroha maira, horo maira, tauvahi maira i nia i to'na aí, hoíhoí maira ia'na. Ua na ô atura oia i to'na metua, "Ua hara vau i te Atua o te raí e ia oe atoa hoi. Te hinaaro nei au ia riro vau e tavini na oe," area râ ua na ô atura te metua i te mau tavini, "A hopoi mai i te ahu maitai roa e faaahu ia'na, e afai mai i te tapea, e e oomo hoi te tapea i to'na rima. A patia i te hoé kafa e amu hoi tatou i te maa e oaoa tatou, no te mea, ua pohe tau tamaiti e, e ua ora mai nei, e ua moe ona e ua itea mai nei."

Ua faaoti te tuaana i ta'na ohipa faaapu, e a haere mai ai oia i te fare ua faaroo oia i te oto vivo e te ori. Na ô atura oia i te hoé tavini, "Eaha te mau mea e tupu mai nei?" Ua na ô maira te tavini, "Ua tae mai to oe teina e ua patia iho nei to metua i te kafa faaamu nei, no te mea i haere ora mai nei oia aore e hoé maí. I reira ua riri roa te tuaana, e aore oia i haere i roto i te fare. Haere atura te metua tane i rapae, taparu atura ia'na. "Ua rave au i te ohipa i teie mau matahiti aénei e aore oe i patia i te kafa na'u, aore atoa oe i horoa mai i te ahu maitai mai ta oe i horoa'tu i to'u teina o tei haere e o tei puhura'tu i ta'na taoá i te mau vahine faaturi. Ua na ô atura te metua ia'na,

“E Tau tamaiti e tia oe i ó nei ia’u nei, e te mau taoá atoa na’u nei, na oe ia. E mea tia hoi ia tatou ia faaamuraa maa e ia oaoa, o to taeae nei hoi i pohe na, e ua ora mai nei, i moe na, e ua itea mai nei.

—*Papaihia e Teina*

Ta Tatou Aveia

E homa, ua ite tatou e, e tere te pahi i te mau vahi ta te raatira rahi i hinaaro ia haere. E mai te mea e, aore e hape ta ratou aveia, e mea pâpû e tae atu ai ratou i te vahi i hinaarohia.

I teie nei, te hinaaro nei au ia faaite atu ia outou na, hoé â huru te aveia o te pahi e te aveia a te Atua ra. E ui mai paha outou e, eaha ia te aveia a te Atua? O teie ia; te mau parau ta Iesu i faaite mai ia tatou nei e te mau faanuraa, e te mau ture hoi ta’na i faaue mai ia tatou ia haapao. E mai te mea e haapao maitai tatou i ta’na mau parau, e tae atu ai tatou i te Basileia a te Atua ra. Ia pee atu tatou i ta’na mau haapiiraa, eita e nehenehe ia tatou ia haere i te tahi vahi ê. No reira, e mai te mea e hinaaro ia tatou e roaa ia tatou te basileia a te Atua, e mea tia ia tatou ia pee atu i ta’na aveia. E i teie nei e ui mai outou, eaha te ravea e ite pâpû ai tatou i ta’na mau haapiiraa. E homa, ua ite outou i te huru o te radio. E mai te mea e hinaaro outou i te haponi i te tahi mau parau i Papeete na nia i te radio mai te ani atu ia ratou ia haponi mai i te tahi mau mea ia outou na, ua ite outou e nehenehe ia faaoti maitai i taua ohipa ra e e roaa ia outou te mau mea ta outou i hinaaro. Te faaite atu nei au ia outou, e mea apî teie nei machine, area râ e mea tahito te ravea a te Atua ra. Ia faa-haehaahia to outou aau, e ia faaea ta outou mau ohipa iino e ia pure atu outou i te Atua ra e faaite ia’na i te mau mea ta outou i hinaaro, e te mau mea ta outou i hinaaro i te ite

e mea pāpū na te Atua e horoa mai ia outou i te mau mea ta outou i hinaaro e faaī i to outou aau i te ite. E tupu mau teie mai te mea e, ua tia to outou pure.

No reira, a pure atu outou ia'na e anei ia'na ia tauturu mai ia outou, e ia faaite mai ia outou i ta'na mau haapiiraa mau. Eiaha outou e imi i te mau mea o teie nei ao, a imi râ outou i te mau mea a te Atua ra. Eiaha outou e faatau, no te mea e tauturu te Atua i te mau taata te tauturu ia ratou iho.

Ua ite outou e, e tupu te hoé huero naīnaī tei tanuhia i roto i te vahi maitai, i te hoé raau rahie e tupu atoa te tahi mau huero e rave rahi mai te huero matamua te huru. E i teie nei te parau atu nei au ia outou, e maite mea e tanu outou i te hoé parau a te Atua i roto i to outou aau, e tupu taua parau ra i te rahi e e tupu atoa to outou hinaaro i te tanu i te tahi atu â mau parau a te Atua ra. E ia na reirahia ua ite outou e, ua tanuhia taua parau i roto i te vahi maitai ra. Ia ore râ tera huero e tupu, e mea pāpū e vahi faufaa ore i tanuhia'i taua huero parau ra. O teie ia te huero e au ai ia tanu i roto i to aau na, maori râ o te parau aroha e mai tei au i te parau o te Aposetolo o Paulo, na te aroha e faatia i te mau ture atoa.

Ua ite outou i te auraa a ta'na mau parau. E mai te mea e aroha outou te tahi i te tahi, aore e nehenehe ia outou ia faaino atu ia ratou. A taió na outou i te mau parau tei papaihia i roto i te Bibilia i te Korinetia I pene 13, te taatoaraa. Te vai rate tau e mou ê atu te mau mea o teie nei ao, area râ te aroha, e ore ia e mou. (A hió i te Korinetia I 13:8) Na te aroha e faatia i te mau ture atoa. Ia taió outou i teie mau parau e te mau parau ta Iesu i faaite mai ia outou, e ite ai outou i te aveia mau a te Atua.

—*Papaihia e Amona*

TE ORA MURE ORE

*Papaihia e te Apotetoro, Orson F. Whitney
Faaauhia ei reô Tahiti e Harave*

E aha te Fatu i teie nei ao nehenehe i hamanihia e ana ra? E haamou anei oia i te reira? Eita. Ia tae râ te hopea ra, e faatia oia i teie nei ao, e parahiraa na te feia parau tia.

I te hoé mahana ra, ua ite au i te hoé parau, e i to'u raveraa i taua parau ra ua ite au i teie papairaa i nenehia i nia iho ra, "E aha ia oe i te ora mure ore?" E uiraa paari roa teie no te pae rahi o to te ao atoa nei, area râ, te faaite mai nei te haapaoraa Momoni i te pahonoraa, oia hoi, ia pohe teie tino tahuti nei, tei roto te varua i te ao varua. E vai noa ra te reira i reira, e e faaea te mau varua parau tia no ta ratou ohipa. Eiaha ia ratou e faatau, aita, e rave râ ratou i te reira ma te rohirohi ore, e ma te mauui ore e tia i roa'tu i te tia-faahou-raa-hanahana, ia ho'i mai ratou i nia iho i teie nei ao, te faahanahanahia i roto i to'na huru tahuti ore.

I te reira ihora taime, te haere ra te reira ihora uiraa i rotopu i te mau haapaoraa êê. "E aha ia oe i te ora mure ore ra?" Ua pahono maira te hoé taata i te na ôraa e, "No te hoé mirioni matahiti matamua, e hió noa'tu vau i te Fatu, ei reira vau e hió rii ai i to'u vahine." Aue te vahine e, e tia i oia e hoé mirioni matahiti no te hoé hióraa iti.

Ua tuu mai te Atua i ta'na mau tamarii i nia iho i te ao nei ia riro ratou e mau taata aravihi i ta ratou ohipa, ei reira e tuuhia anei ratou i te tahi vahi e, ia hope roa te taime e vai ano noa te fenua? E parahi anei ratou i reira e hauti i to ratou rima mai te hió-noa-raa i te Fatu e hoé mirioni matahiti? E mea tia anei te reira? E mauruuru anei te Fatu ia hióhió ia'na ra? E manaó maitai anei te

reira? Te parau atu nei au, aita.

Eaha ia ta tatou ohipa ra?

E rave tatou i te ohipa ta tatou e haapii nei i nia iho i teie nei ao, mai te au i to tatou ite. E hau roa'é to tatou ite i te ao i mua'tu, e hau hoi to tatou ite maitai.

“Mai te taata i teie nei te vai ra te Atua i mutaa i hora; E nehenehe hoi i te taata ia riro mai te Atua ra i teie nei.”

Te Huru i Te Tahī Pae o Tatou

Eaha te huru o te tahī pae o tatou? Teie ia, mai te au i tei faaitēhia mai e Paulo i roto i ta'na epitesole i te feia i Roma. “E parau mai anei oe ia'u e, eaha hoi oia i faaino mai ai? O vai hoi tei faaore i to'na hinaaro? Eiaha na râ, e tera ra taata e, o vai hoi oe a mârô atu i te Atua? E parau atu anei te mea hamanihia i tei hamani ia'na ra e, eaha oe i na reira'i i te hamani ia'u nei? (Roma 9; 19-20)

Te manaó nei te tahī pae o tatou e, no te mea, ei mau taata haapaó ore te tahī pae; i hamanihia'i te reira mau taata e te Atua no te rave-tamau-noa-raa i te mau peu iino o te ao nei; area râ ia feruri maitai tatou, aore roa teie manaó i tia. No te mea, eita e nehenehe ia tatou ia parau e, ua taa ê te tahī varua i te tahī no te mea, hoé â to ratou pûpû, e hoé â to ratou taata faatere, oia hoi te Atua.

No reira e tia ia haamanaó tatou e, aita to tatou mau varua i taa ê te tahī i te tahī. Teie râ ia te tumu i taa ê tatou te tahī i te tahī no te mea e, te vai nei na mana faatere rahi e piti i te ao nei, oia hoi to te Atua mana e to Satani mana ra. No te mea ua hinaaro te tahī pae o tatou i te mau haapiiraa a te Atua e i Ta'na mau haamaitairaa, mai te aroha, e te oaoa mau, e e rave rahi atu â, na pee ia te tahī pae o tatou ia'na ra. Inaha râ te tahī pae o tatou, te imi nei ratou i te mau mea i faatupuhia na roto i te mana o Satani, oia hoi te mau mea ia i parauhia e te taata nei ei

arearea. E ore roa râ te reira mau mea i te mahana hopea; eita ta te Atua ra e ore e a muri noa'tu.

Te reira ia te tumu i taa ê tatou te tahi i te tahi no te mea e, i taa ê to te tahi mana faatere i to te tahi. Te vai atoa ra teie iho â huru i rotopu i tē feia i te tau no Paulo no te mea e, te ui maira ratou ia'na, eaha te tumu te Atua i faaino mai ai, no te mea ua manaó ratou e, ua hinaaro te Atua ia rave tamau noa te tahi pae o ratou i te ino. Ua pahono atu Paulo e, O vai oe a mârô atu ai i te Atua? Teie ia te huru o taua taata ra mai tei au i te parau i roto i te Roma 2: 1. "E teie nei, e ore oe e faatiahia, e tera ra taata, e te taata atoa e faahapa'tu; i taua mea hoi ta oe i faahapa ia vetahi ê ra, te faahapa atoa ra oe ia oe iho; o oe hoi e faahapa na, te rave atoa ra oe i taua mau mea ra."

Mai te mea e, e faahapa nei tatou i te Atua no Ta'na ohipa, e mea pâpû roa te faahapa atoa nei tatou ia tatou iho no te mea, te hamani atoa nei tatou i te mau mea i te ao nei, oia hoi te rave atoa nei tatou i taua mau mea ra. Eita roa tatou e mauruuru ia parau mai te mau mea ta tatou i hamani e, ua hape ta tatou hamaniraa ia ratou.

Teie ta Isaia parau i te taata o tei parau atu tei hamani ia'na ra. "E pohe to'na to tei mârô i tei hamani ia'na ra. Ia na reira nōa'tu te potera i te mau potera e rave i te repo nei. E parau atu anei te araea i te potera, eaha ta oe i rave na? E parau anei ta oe erave ra, aita o'na e rima?" (Isaia 45:9)

Ua rahi aé to te Atua mana i nia iho ia tatou, no reira aita ta tatou e parau ia'na. Na reira atoa te mau mea ta tatou i hamani, aita ta ratou e mana i nia'é ia tatou. A haamanaó noa râ tatou e, eiaha e faahapa ia vetahi ê ra no te mea ia na reira tatou, te faahapa nei tatou ia tatou iho.

—Papaiahia e Coleman

E AAMU

Na mua roa i te anotau o Iesu Mesia te vai ra te hoé oire, o Atena to'na ióa. I roto i taua oire ra te vai ra te mau ohipa nehenehe no taua anotau ra, e ua haere noa mai te mau taata tuiroo no te mau fenua atoa ia faaea rii i reira. Tei ia ratou te mau fare haapiiraa maitatai, te mau orometua ite, e te tahi atu â mau mea tei ume mai i to rapae ia haere mai i reira. E roo maitai roa atoa to te feia apî tane no teie vahi.

Teie mau tane apî ra, e mea nehenehe ratou e te mâ e te haapao maitai. No to ratou haapao-maite-raa i te mau ture fenua atoa ua roa ia ratou teie roo maitai. A vai noa'i ratou i te apîraa ua fafau ratou i te hoé faufaa i mua i te feia faatere no taua oire ra, e teie ia taua faufaa ra: "Eita matou e faaino i teie, to matou oire rahi ra, na roto i te hoé ohipa haavare e aore râ na roto i te aau mataú. Eita matou e horo i mua i te enemi. E aro matou i te parururaa i te mau peu here e te tura a teie nei oire, noa'tu i to matou rahi e aore râ i te naínaí. E faatura matou i te mau ture e e haapao hoi matou ia ratou atoa. E tamata atoa matou i te haapii i te mau taata ia na reira atoa ratou. E na reira matou i te haamaitai i teie oire e ia ruau matou, e horoa matou i te hoé oire te hau i te maitai i to matou mau huaai."

Na roto i to ratou haapaoraa i teie parau faufaa, ua roa te hoé roo maitai i to ratou oire, e ua haere te hoé mau matoi i reira e noho rii ia hió mau i to'na huru. A tae ai ratou i reira ua ite ratou e, aita e paturaa tei haaati i te oire ei parururaa i te enemi ia haere mai ratou. I tana anotau ra e patu iho â te mau taata i te hoé aua teitei e ati noa'é i te oire ia ore ia nehenehe i to rapae ia haere noa mai i

roto. Ua ui atura taua mau matoi ra i te arii, na o atura, "Teihea ta outou paturaa?" Ua pahono maira te arii, "Aita e â oe i ite i ta matou aua paruru? A hoî mai outou i te hora vau i te poipoi e na'u e faaite ia outou i ta matou aua nei." I taua po iho ra ua haere te arii e faaue atura i ta'na mau tavini ia haere e faaite haere i taua feia apî tane ra ia haaputuputu mai no te poipoi ra. Na mua atu i te hora vau na tae mai ratou atoa, apapa ratou ratou iho ia afaro maitai, tia i hora ia tae mai te mau matoi. A tae atu ai te mau matoi ua hió ratou e i reira ua parau atura te tahi, na o atura, "Inaha, te aua no Atene, e ua riro ratou tataitahi ei ofai patu mau."

E ofai paari anaé ratou, aita e hoe tei paruparu i rotopu ia raton. Ahini e peu haapao ore ta ratou, oia hoi aita ratou i haapao i te mau ture atoa, ua riro mau ratou ei aua faufaa ore e te paruparu hoi.

—*Papaihia e Mati*

Te Mau Parau Apî

NA TO TE TUAMOTU: E tupu mai to outou mau-ruuru, ia ite outou e, ua oti ia Vito Rau te mau buka to-mite fenua no te pae Tuamotu taatoa.

Ua riro atura ia ei ohipa ohie ia'na i te imi na tei hina-aro, i ta ratou mau tomité; no reira, e mea tia roa i te mau fatu fenua tei ore i roaa ta ratou mau tomité, ia haere ia'na ra no taua vahi ra, e ia rave atoa mai hoi i ta ratou mau parau faturaa no roto mai i te piha tomiteraa fenua.

TE AMUIRAA I FAATIAHIA I HIKUERU

Ua faaterehia te amuiraa i Hikueru i te 4,5,6. e te 7 no Atopa 1930. Ua haamatahia te Amuiraa i te ahiahi mahana maa i te 4 no Atopa. Na te mau vahine apî o to Hikueru i faatere i ta ratou haapiiraa hohoá, e mea maitai roa te reira. Ua taióhia e 354 taata tei tae mai.

I te pae no Atopa, oia hoi i te mahana Sabati, e mau pureraa maitai anaé i faaterehia i te ao. E i te pô, na Ragi varu raua o Tufarua te hoé haapiiraa tuuraa tapao i faatere taua pô ihora.

I te ono no Atopa, ua faaterehia te hoé pureraa no te oroa bapetizoraa no na taata toopae. I murimai ua faaterehia te hoé opereraa maa na to te mau faaroo atoa.

Ua tahoéhia te mau taata rii no Hao, no Amanu, no Tauere, e no Marokau, e i taua pô ihora, ua faatere ratou i te hoé haapiiraa Evanelia e te tahi haapiiraa hohoá'toa, e e rave rahi te mau taata i tae maira, oia hoi e 454 taata.

I te hitu no Atopa, ua faatere Kehauri ma i te haapiiraa hopea no te Amuiraa, oia hoi e haapiiraa hohoá, e e tufaa ta te mau taeae apî no Hikueru anaé i roto i taua hohoá ra. O teie ia te haapiiraa hohoá maitai roa i te mau haapiiraa i faaterehia ra, e ua rahi roa'tu te mau taata i tae mai, oia hoi e 772 taata i taióhia.



PARAU FAATE

E faatiahia te Amuiraa Eperera na te Ekalesia a Iesu Mesia i te Feia Mo'a i te Mau Mahana Hopea Nei, i Papeete i te 3 e tae noa'tu i te 6 no Eperera 1931, no te mau fenua Tuamotu. E Faatia-atoa-hia te Amuiraa i te fenua ra i Tubuai.

PAPAIHIA E GIHOTI BOROPITI

PERETIPENI NO TE MAU FENUA MOANA NEI.

M. Bonnet M. Gerant et Imprimeur,
Rue Brea et de la rue Dumont d'Urville, Orovini, Papeete